

# COUNTEIS E VIORLAS

LOU CURET DE PEIRO-BUFIERO

E LOU

CHAVAU DE BATISTOU

PER

AUGUSTO CHASTANET

PELIBRE MAJOURAU

BIBLIOTHEQUE  
DE LA VILLE  
DE PERIGUEUX

Illustrations

de L. DANIEL

Prix :

1 franc



PÉRIGUEUX

EMPRIMARIO E LITOGRAFIO RONTEIX ET BONHUR

7, Rue Gambetta, 7

1886



Chastanet

# COUNTEIS E VIORLAS

LOU CURET DE PEIRO-BUFIERO

E LOU

CHAVAU DE BATISTOU

PER


AUGUSTO CHASTANET

FELIBRE MAJOURAU

PZ 2601

ILLUSTRATIONS

L. DANIEL



BIBLIOTHEQUE  
DE LA VILLE  
DE PÉRIGUEUX

PÉRIGUEUX

EMPRIMARIO E LITOGRAFIO RONTEIX ET BONHUR

7, Ruó Gambetta, 7

1886



## AU LETOUR

---

I'a beléu de la gent qui troubaran  
que qu'ei d'un orre eisemple d'eicrire  
dinsla lengo que notreis ancien parlaven  
e que nau persounas sur die parlen  
enquèro dins quete païs.

N'i'a pus noumas lous paisans, vous  
diran, que parlen *patouas*.

Faut lur reipoundre, à quis béus  
messurs, que lous paisans lous valen be,  
per lou mens, que la lengo d'un païs ei  
toujour bouno à parlà, e que si las lengas  
de notre béu Miejour deven, un jour où  
l'autre, s'eivanusi davant lou parlà  
franceis, au lec de marchà côto-à-côto  
coumo frai e sor, lous que vendran pus  
tard siran beléu pas maucountents que  
i'aie gut dins notre Perigord quauqueis  
felibreis perlurnen gardà un darnié resto.

A. C.

---

MOUS FRAIS !...





LOU  
CURET DE PEIRO-BUFIERO

A FRÉDÉRIC MISTRAL  
CAPOULIÈ DAU FELIBRIGE.

Dis Aup i Pirenèu, e la man dins la man,  
Troubaire, aubouren dounc lou viei parlà rouman,  
Aco's lou signe de famiho. (\*)

MISTRAL.

I

Dins lou plai qu'a perdut sas felhas  
N'i'a de vert noumas lou bregou.  
Roussignòus, parpalhòus e belhas,  
Ante sount-is ? dijas-me zou.  
Lou grèu se taiso ; la cigalo,  
I'a loungetms qu'a plejat soun alo  
Sus lou grand casse tout roussèu.  
Semblo que la campagno ei morto.  
La graulas ranen dins lou cèu ;  
Lou paubre vai de porto en porto.

(\*) Des Alpes aux Pyrénées, et la main dans la main, poètes, relevons donc la vieille langue romane ; c'est là le signe de famille.

A passat flour l'ou meis de mai ;  
Lou mato-chabro fai soun diable ;  
Mas lous blats an un brave nai,  
L'auro dau gru jous lou redable.  
Jous la cendre soun lous viròus,  
Lous us peten coumo daus fòus,  
Lous autres cosen sans re dire ;  
La Jano a tirat lou vi blanc,  
E iou qu'aime à chantà mai rire,  
Co me torno pinto de sang.

Eiperas belèu quauque counte.  
N'ai toujours un dins moun sachou,  
Car iou, que davale où que mounte,  
Qu'ei moun meitiè d'être risout.  
Si voules, parlarem enquero  
Dau Curet de Peiro-Bufiero ;  
M'arretarai quand aurai set.  
Notre ome un jour mounto en chadiero,  
E veiqui coumo lur disset.  
Après 'vei fai *au noun dau Pèro* :


II.



Mous frais, i'a belèu daus pastours  
Que soun countents de lurs ouvelhas.  
Las mias me fan purà toujours  
A nen fà sabroundà mas selhas.  
Ah ! perque lou boun Diou m'a-t-èu  
Meis à la tête d'un troupèu  
D'omeis, de fennas e de filhas  
Qu'enventen toujours quauco re  
Per fà bien ounto à lurs familhas  
E gaire d'òunour au curet !

Lous omeis ! parlam-nen. Janeto !  
Ante ei toun ome lou dimen ?  
Dijo, ante ei-t-èu ? E tu, Miieto,  
Ante ei toun pai ? Ah ! bravo gent,  
Votras lengas soun eitachadas,  
Que van si be quand soun lachadas.  
Eh be ! Janeto, eicouto un pau :  
Toun ome bèu, mas pas 'la quado.  
Boutas queràque trop de sau  
Dins sa soupo e sa saugranado ;

Lou paubre ome a lou gourjarèu  
Salat, pebrat coumo uno andoulho,  
E n'i'a noumas lou vi novèu  
Que deissale bien. Ah ! si foulho  
Deitrempà dins l'aigo dau riou  
Quèu còu salat, l'ome ei crantiou  
Sirio lèu mort de la pepido.  
E toun pai ! Miieto, toun pai  
Ei causo que dins la partido  
I'a dous rats de cavo de mai.




Quelo gent, fau qu'aian la fèure  
Que lous te lou jour de dimen  
Per que lachan jamai de bèure.  
Qualo crugnolo ! Urousamant  
Que tous lous gouts soun pas de mèmo  
Si n'ei qu'à tous lur prend la flémo  
Per veni prejà lou boun Dïou.  
Lous us van fà dansà las filhas ;  
D'autreis jeuguen, iver, eitiou,  
Lou bouchai, la brisco òu las quilhas.

Sur semmano, n'i'a mai d'un quart  
Qu'à cops de poueng dounden lur fenno.  
Quis cops de poueng, qu'ei pas l'asard,  
Mas quei lou boun Dïou que lous senno.  
Ah ! quand voulhas vous maridà,  
Fouguet pas bien vous couvidà ;  
Risias, mai qu'ero pas doumage.  
Auro, qu'ei un pau refresit,  
E lou boun Dïou qu'ei lou pus sage  
Vous punit d'avei mau chausit.

Si lou pètre que vous marido  
Poudio, per corrijà lou sort,  
Em d'un pau d'aigo beneisido  
Deifà queu noud de siau retord,  
Aurio de la pratico enquero  
Mai que n'a quante vous eipero,  
Jalat, dins un coufessïounau,  
E tous li pourtarias, si voulho,  
Pouleis, chapous, dindas, lebrau,  
Moutous, vedèus, mai biòus si foulho.





-7-

Mas aurias bèu pourtà presents,  
Goureis de lat, burre e voulalho ;  
Touto la frucho dau printems,  
Tout lou blat, mai sa quitto palho ,  
Qu'ei coumo si davant un bouc  
Naveis chantà l'er de Marbrouck.  
Qu'ei coumo si preniais 'no grato  
Per nà 'la paicho dau lusert ;  
Qu'ei coumo si preniais 'no lato  
Per sautà per delai la mer.



Paubras sotas que ses ! Enquero,  
Si, quante aves dàus mainajous,  
Sabias, en bouno mainagiero,  
Lur balhà de bounas leiçous !  
Mas pla ! qu'ei de la sauvagino.  
Tanlèu que lur viren l'eichino  
Van jous l'alo fà lou sabat,  
Fan mai de brut que cent troumpetas,  
Pleis de maliço coumo un chat,  
Couquis coumo de las beletas.

E quand soun pus grands, aleidounc  
Lous veses grimpà sus lous aubreis.  
Lous debas et lou pantalon  
Lur duren pas loungtems, lous paubreis ;  
Mas lous galapians an plasei  
De deijunà sur un ciriei.  
N'an pas pòu de la còcolucho  
Quis secoudaireis de pruniè  
Qu'ausen veni minjà ma frucho  
Jusqu'au mitan de moun vargiè.

Mas, mous frais, si'ei boun de lous veire,  
Qu'ei quand coumencen de drujà ;  
Co juro, co bèu à ple veire,  
E daus us cops à se nejà  
Pas mai qu'un grapau n'a de plumo  
Co n'a de barbo, eh be ! co fumo  
La pipo et lou quite cigar.  
Co prend la talho à la jòunesso  
E co ve toujours en retard  
Quand ei questiou d'auvè la messo.





LA FRANCILHOTO



La fennas ! mous frais, tournam gui.  
Pode dire sans credà garo,  
Quand pense à la d'enperaqui,  
Que se perd mai d'un cop de barro.  
N'i'a, lur balharias lou boun Diou,  
A las veire, sans coufessiou.  
An la mino douço einoucente  
Coumo si surtian de tetà.  
Meifias-vous de l'aigo durmento,  
V'autreis que sabes pas noudà.

Fau pla creire que dins la fiero  
Tous lous aseis se troben pas  
E qu'au bourg de Peiro-Bufiero,  
La corno nai jous notreis pas.  
— Ante vas-tu, ma Francilhoto ?  
Disio Piarilho à sa fennoto  
Que jous soun bras tenio un paniè. —  
N'i'a qu'un re lur fai pöu, mas quello :  
— « Vau dins notre bos de blanchiè  
Quère daus dounjaus, » disset-elo.

La Francilhoto vai au bouei  
Em soun paniè per countenenco.  
Gui troubet lou joüne Francei  
Que l'eiperavo coumo un penso.  
Ne chercho gaire de dounjau  
La poulo que rancountro un jau.  
La fenno, quand fuguet tournado,  
Aguet lèu boueidat soun paniè.  
Cambe n'i'a-t-eu dins la coutrado  
Que briden l'ase, tout pariè !

E cambe n'i'a de quelas filhas  
Que, poussadas per lou demoun,  
An l'argent-viöu dins lurs chavilhas,  
Mas qu'auvan chabreto où viöuloun!  
La proucessiöu, co las einoio,  
Mas la danso la boto en joio.  
Souliès farrats e souliès fis,  
Raubo lusento e vestas rufas,  
Tout co sauto coumo chabris,  
Tout co viro coumo baudufas.



Mas lou diable ei dins lou viouloun,  
Mas lou diable ei dins la chabreto ;  
Lou diable, souple coumo un jounc,  
Ei lèugiè comme uno lumeto.  
Sauto dins votreis entrechats,  
S'entrebraicho dins votreis pas,  
Mai vous eitounares enquero  
Si n'a quaucuno tous lous ans  
Que fai, après quauco sautiero,  
Passà Pàqueis avant Rampants.

Ah ! paubras fennas, paubras drolas !  
Cò vous passaro dounc jamai ?  
Dins quello copo d'erbas folas  
Couràs faucharem-nous d'atai ?  
Ai bèu, iou, dins quello chadiero,  
Vous preichà, jòunesso lèugiero,  
Quei coumo si prenio un bugnet  
Per fà 'no partido de paumo  
E si foueitavo moun bounet  
Sur las avelhas de ma saumo.

Mas si'ei be, co vous passarò,  
(Vent que roufflo, l'aigo l'arrèto.)  
Quante lou boun D'ieu sennarò  
Sa neveio sur votro tèto,  
Quand aures lou cagouen cramat  
Et lou parpai dins l'estoumac.  
Belèu, belèu vendres dévotas  
Quand, un bèu jour (l'apele bèu),  
Sentires darniè votras potas  
Poussà douas banas de sarcèu.



Eh ! diran, ves la Francilhoto  
Que toujours s'eipiavo au mirai,  
Que dansavo lous jours de voto,  
Freicho coumo lou meis de mai,  
Risoto coumo uno fauveto,  
Lesto coumo une parrinqueto ;  
Sas blanchas dents, qui z'aurio dit  
Que vendrian coulour de blespagno !  
Sous grands eis, soun nas si pitit !...  
A vielh' veiqui ço qu'un gagno.

E lous omeis ! quand siran vieis,  
Qu'auran l'ei legagnous, la tètò  
Plumado coumo mous janoueis,  
Diran boun-sei aus jours de fèto.  
Foudro bèure l'aigo dau rïou,  
Mai belèu prejà lou boun Dïou ;  
Foudro lachà quello chadeno,  
Que chaque anèu ei un pechat ;  
Foudro se tutà la peitreno  
E fà la crous sus soun passat.

Mas n'i'a que re ne lous corrijo.  
An bèu aiei tous lurs piaus blancs.  
Per lou cèu mōus coumo uno fiço,  
Bladen noumas à pitits lans.  
Lou talheur prend soun avanturo  
Sus l'eitofò e sus la doubluro.  
Lous marchants troumpen sus lou peis,  
Que vendan sau, sucre où rousino,  
Lou boulengiè sus lous coumbeis  
E lou mouniè sus la farino.




Dins quèu troupèu de paroufiens  
Que assemblo dins quello eigneijo,  
Tout ço que i'a de bous cre tiens  
Vau pas uno couo de cireijo.  
Mas, miserableis ! sables-vous  
Ço qu'arribaro de nous tous ?  
Drubent soun alo eipourissablo,  
L'ange dau darniè jujament,  
Dins sa troumpeto redoutablo  
Un jour bufaro talemant

Que lous morts de touto la terro  
Que jous la toumbo fan lur soum,  
En s'eivelhant dins lur poussiero,  
S'auviran noumà per lur noum.  
Lous que creubo la terro e l'oundo  
Surtiran de lur net prigoundo  
Per eipelì dins la clartat,  
E lou boun Dïou, notre grand juge,  
Dins sa tarriblo majestat  
Vendrò. Ni'auro pas de refuge.

Ni couen, ni cros per se cachà.  
Lous que soun en eitat de gracio,  
Lous que n'an fai noumas pechà,  
Tous pareitran davant sa facio :  
Grands e pitits, orreis et bèus,  
Dreits e torts, negreis e roussèus,  
Lous pus gros coumo lous pus minceis,  
Moussu lou duc coumo Jantou,  
Lous meitadiès coumo lous princeis ;  
Lou boun Dïou lur dirò : « Debout ! »

Tous chercharan dedins lur vito  
Ço que lur peso tant e mai,  
E, coumo un boueido une marmito,  
Zou voudrian pla tout foueita lai ;  
Mais lai re se perd, re se sarro,  
Lou boun Diou a la vùdo claro ;  
E quand, anfin, moun tour vendrò,  
Lou rei dau cèn e de la terro,  
Lous eis lusents, apelarò  
Lou curet de Peiro-Bufiero,

E li diro : — « Curet, curet !  
» Qu'as-tu fai de quelas ouvelhas  
» Que te balhis de moun bras dret  
» Per las acelà jous mas trelhas ? — »  
Leidounc, mous frais, tout interdit,  
Lou me farai pitit, pitit,  
Coumo fau dins quello chadiero,  
Mas lou boun Dïou diro pus fort :  
« Aut, curet de Peiro-Bufiero,  
» Que vas etre jujat d'abord !





Samuel

18

» Qu'as-tu fai de quelas ouvelhas  
» Qu'un jour de fêto te balhis  
» Per las acelâ jous mas trelhas  
» E las touchâ en paradis ? — »  
E l'auvires tounâ. Quau tremble  
Que vous prendro toutas ensemble !  
E lou diable eibraseiarò  
Soun grand fougié de bouei de brasso  
Quand lou boun Diou me parçarò  
De sous eis que founden la glaço.



Ah ! fuguesso lou mut ! Pamens,  
Foudro-t-èu be que li reipounde  
Per iou mai per vous quaus turments  
Jous lous eis de tout aquèu mounde !  
Voudriò sautâ rejas e plais ;  
Mas sirai be fourçât, mous frais,  
De segre las routas planieras.  
Li dirai aleidounc : « Un jour,  
» Segnour, bètias me las balheras,  
» Bètias vous las torne, Segnour. »



## A LA BRAVO GENT

---


Vautreis que ses de bouno umour,  
(Co vaut mai que d'avei la féure)  
Ai fait quèu counte en votro òunour,  
Legisses-lou quand veires pléure.

Iver, eitiu, rises toujours ;  
Vous arrêteis noumas per béure.  
Mas, z'auves be, qu'à votre entour,  
D'aigo jamai degun s'abéure !

Car, zou sabes pla, bravo gent,  
Lou jus que vet de l'eissirment  
Plât mai que l'aigo de la selho.

Reglas-vautreis sur Batistou  
Qu'ero toujours ple de rasou  
Quand avio boueidat sa boutelhos.

---



## LOU CHAVAU DE BATISTOU <sup>(1)</sup>



ur la fi dau béu meis de mai, quante lous bigarréus coumençaven d'ufilà e lous pitits coucuts de boutà lous coutissous, moussu de Freto-Parpai, que demouravo au châtéu de Peiriau, dins la paròfio de Sent-Eitropi, en Perigord, fuguet preis per uno ataquo en deijünant.

Ero pas meichent ome. N'aurio jamai passat à coutat d'uno gento drolo sans i trucà lou babignou, e n'avio beléu be trop trucat dins sa vito, lou paubre, car ero vengut un pau raco dins lous darniés tems, mas codaqui, qu'ei entre n'autreis.

Sa paubro fenno, sous vésis, sous vâleits, sas chambarieras, sous meitadiés, tout aquéu mounde ero en l'er. I fasian sinà dau vinagre, i fretaven sa paubras chambas ; naven e venian qu'aguessas dit un fermigié ; mas re n'i fasio e lou malaut tournavo pas prêne couneissenço.

Madame de Freto-Parpai, touto treblado, faguet nà quère moussu Rabanéu, un grand medeci (avio sieis peds passats), que restavo pas louen dau châtéu. Envouïet de mai à Sent-Eitropi per

(1) Quéu compte a gagnat, au counours literari de las fétas latinas de Montpellier (26 de mai 1878) lou buste en brounze de Rabelais, pris unique, òufert per milord Bonaparte-Wyse.

damandà moussu lou curet e lou noutari que l'apelaven moussu Curobourso. Quis dous messurs balheran per reipounso que nàven parti cop-sec.

Fasio uno chalour à fà badà tous lous luserts et tous lous picataus dau país.

— Coumo farai-iou, se disio lou curet, per nà à Peiriau ? Moun vicari a preis ma paubro vielho jument per nà veire sa mai, e ne vole-iou gra nà à Peiriau à ped emd un tems de chaumasso coumo fait. Siriô meitat foundut en arribant, où per lou mens eibulhentat.

— Coumo farai-iou, se disio moussu Curobourso, per nà à Peiriau ? Moun paubre *Fend-l'air* ei meitat mort e ne vole-iou gra nà à Peiriau à ped emd uno chalour capablo de fà eivanusi uno cigalo e de fà eisi lous iôus à l'oumbro.

Faut pertant i anà, se disio lou curet ; zou faut , qu'ei uno paubro amo que co fariô ounto ad un pètre de la laissà partî sans la sauvà.

— Faut pertant i anà, disio moussu Curobourso, zou faut. I a quî un boun testament à passà e co fario gaire òunour ad un noutari de mancà un boun cop entau.

— Coumo fà, moun dîu, coumo fà ? se disian-t-is en s'eissujant lou frount, l'un dîns lou saloun de sa curo, l'autre dîns soun eitudi.

— Ah ! disseran-t-is en mèmo tems, i a Batistou qu'a un chavau, qu'ei moun afa

Batistou (qui l'a pas counegut ?) ero l'òutelié de Sent-Eitrôpi, gros coumo uno barrico, round coumo uno couïo e rouge coumo un dindau. Dempei mai de cranto ans éu fasio de-tenenti lou mèmo trabai. Lou paubre ome cresio d'avei un verme dîns soun corps e bevio a tout pas-moument per fi de lou néjà, mas ei de creire qu'avio a fà ad un verme fier et santous, car tamai éu bevio e tan pus pau lou verme se nejavo. Tout l'encountrari, la meitat dau tems qu'ero Batistou qu'ero nejat.

Eu venio de lampà uno bouno rouquilha de vi blanc quante lou curet et lou noutari'entreran tous dous au cop dîns soun auberjo, l'un per la porto de davant, l'autre per la de darrié e notreis dous omeis que se presenteran en mèmo tems davant Batistou, crederan tous dous au cop : « Lou chavau ! »



BATISTOU



Batistou que sa figuro coumençavo de lusi e que lou eipiavo en se damandant si eran venguts fòus, lur disset bien òunetament en tirant soun bounet de coutou : « Que i a-t-éu, messurs, per votre service ? »

Aleidounc moussu lou curet e moussu Curobourso se bouteran à parlà en mèmo tems e disseran à Batistou qu'a vian besoun de soun chavau per nà cop-sec chas moussu de Freto-Parpai qu'ero en dangié de mort.

— Messurs, lur disset Batistou, n'ai noumas un chavau dins moun eicurio.

— Per iou ! per iou ! crederan lou curet e lou noutari, qu'aguessas dit qu'avian uno plumo dins lou gourjaréu.

— Messurs, disset Batistou, demande noumas à vous fà plasei, mas boutas v'autreis d'acord per me dire lou quau de v'autreis dous déut mountà mon chavau.

— Iou, iou ! disseran-t-is, que poudian pus gemà.

— Batistou, tu ne voudrias pas queràque deiplaire à toun curet.

— Batistou, tu ne voudrias pas queràque deiplaire à toun noutari.

— Iou ne vole deiplaire à degun de v'autreis, messurs, mas n'ai noumas un chavau.

— Selo-me lou, disset lou curet.

— Selo-lou, disset moussu Curobourso, mas co siro iou que lou mountarai.

— Fares gra.

— Farai pla.

— Si'ous plât, messurs, vous facheis pas, disset Batistou ; per de la gent de votre eitat, co siriô orre. Vaut-éu pas mieï que chacun de v'autreis me counte sas pitas rasous tant que mon chavau minjo la civado ? Aven lou tems, la paubro bétio fait noumas coumenças.

— Te prène per juge, disset lou curet, que sous piaus se levaven.

— Decido-nen, disset lou noutari, que sas dents eiman-ciaven.

— Siau, messurs, siau ! disset Batistou. Faut pas être si viu, laissas-me fà.

E Batistou sounet la Jani, sa chambariero, que poutet sur la taulo treis goubeleis bien rinçats e un béu pichié de faianço ple d'un boun vi blanc de Ginestet, que semblavo uno clouco au mitan de sa pito cloucado. Batistou emplisset lous goubeleits tant que nen poudian tène.

— A votro santat ! messurs, lur disset en trinquant. Qu'ei boun per tuà lou verme.

Quante se fuguet eissujat las potas : — Parlas, moussu lou curet, disset-éu, iou v'eicoute. E vous mossu Curobourso, badeis pas.

— Dijo-me, Batistou, disset moussu lou curet, dijo-me si qu'ei pas un escandale que moussu Curobourso s'entête de me pas cedà Qu'ei-co dounc qu'un noutari per s'ausà coumparàad un curet ? Un noutari ! qu'ei un ome que trabalho noumas per de l'argent. Damando i, Batistou, si fait per re sous ateis e sous countrats. Perqu'ei-t-éu si preissat de nà à Peiriau ? Te zou vau dire, iou ; qu'ei per fà lou testament de moussu de Freto-Parpai, e un testament entau, qu'ei une fount que n'en rivo pas de l'aigo claro, coumo à la fount de Sourzac, mas de bous louvidors bien rousséus e de bounas pistolas bien lusentas. N'ei-co pas orre, n'ei-co pas abouminable qu'un ome sia tant pourtat per levà de l'argent ?

Mas sur queto terro, Batistou, sur queto terro, i à quaucoré mai que lous meipresableis proufits que tant de gents enveien. I a lous interèts dau céu, i a lous interèts de l'amo. E qu'ei iou Batistou, qu'ei iou que represente dins queto parôfio quis interèts sacrats que deven passà avant tout. Si me tarzo, à iou, de nà à Peiriau, creseistu que co sio per abenà quauqueis sòus ? noun gra : qu'ei per assegurà lou salut d'uno paubro amo, qu'ei per la tirà de las mas dau demoun e per la fà mountà en paradis sans la fà passà per lou pergatori. Tu deveis dounc coumprène, Batistou, sans coumptà que co praisso, que moussu de Freto-Parpai a mai besoun de iou que d'un ome coumo moussu Curobourso.

— A votre tour, moussu Curobourso, disset Batistou, e vous, moussu lou curet, badeis pas.

— Z'as auvit, Batistou, z'as auvit, ço que vet de dire moussu lou curet. Coumo las troubas sa rasous ? Lous noutaris, sedit trabalhen noumas per l'argent. Qu'ei-t-éu pas penable quante un ome véut si be la palho dins l'ei de soun vesī, que vese pas la cadeno qu'ei dins lou séu ? Ah ! trabalho, se dit, noumas per l'amo e jamai per l'argent. Dijo-me doum, Batistou, si qu'ei em daus eiclapous que païen sa peno quand vait fà un entarrament, si se countento

d'uno cuo de mouluïo quand fait un maridage e d'un têt de cacau quand fait un batême. Si manlevavo pas daus louvidors bien rousséus e de la pistolas bien lusentas à sous paroufiens, aurio-t-éu dins sa basso-cour de belas dindas, dins sa cousino de bounas trufas e dins sa cavo de boun vî viei ? Si lou meinageis que naissen, si lou vieis que morent, si tant d'embecileis que se mariden i furnisian pas de que se bien nurri, sirio-t-éu gras bourbat coumo-t-éu ei ?

Dijo-me, Batistou, dijo-me si quante un ome ei en dangié de mort, soun prumié souen ei pas de fâ soun testament. Moussu de Freto-Parpai laisso-t-éu pas à soun entour uno paubro veuvo que lacharo beléu pas d'un an de purâ e qu'a besoun que soun ome i laisse de que pourtà soun dôu òunourablement ? Laisso-t-éu pas daus vâleits, de las chambarieras que l'an soignat pendent sa vito e n'ei-t-éu pas juste que recouneisse lurs bous serviceis en lur assegu-rant quauco pito pensü, en lur leissant coumo souvent quauque benachou ? Boun coumo-t-éu ero, creseis-tu qu'eu velhe mourir sans dounâ quaucoré per lous paubreis de la parôfio ? Qu'ei dounc iou, Batistou, tu zou veseis, que deve arribâ a Peiriau lou prumié.

Batistou coumençavo du purâ, mas ei segur que qu'ero lou vi blanc que n'ero causo. Se passet la ma dins sous piaus blancs, qu'ero soun abitudine quand ero embarrassat, mas per assemblâ sas ideias, tournet emplî soun goubelet, avalet uno outro lampado, faguet petâ sa lengo e prenguet un er countent coumo un ome que tet ço que chervavo. Venio de troubâ dins soun got de vî blanc la drechuro que tous lous jugeis n'an pas, car qu'ei segur que qu'eu brevage coulour de soulei maduro lou jujament.

— Dijiôu passat, disset Batistou, moun chavau pourtet à la fiéro de Sent-Astié dous sacs de blat que pesaven paubrament cent-seissanto la peço. V'autreis dous, l'un dins l'autre, ne pesas pas gaire mai. Moun chavau pot dounc vous pourtà, l'un davant, l'autre darrié. Co vous vait-éu coumo aco ?

Reipounderan tous dous que co lur counvenio, mas voulian tous dous être davant, ço qu'ero ors de poussible.

Dins quete moument, la Jani menet lou chavau selat e bridat. Lou curet e lou noutari i courgueran, l'un à drecho, l'autre à gaicho, e bouteran en mêmo tems lou ped à l'eitriü, mas en prenent lur lan tous dous au cop per eicambalâ, se trouberan enlertats sur lou chavau, nas countre nas, e naven se prêne à piau.

Batistou venguet enquero à lur secours : Lous faguet d'abord trinquâ e pei tirâ à la courto-palho. Lou noutari tenguet de l'asard

lou dret de mountà davant. Lou curet, d'en prumié, roumavo be tant-si-pau, ma en routo fagueran la pas e mémo lou curet partaget aveque lou notari l'oumbro de soun parasor.

— Pamens, vas me dire, qu'ei moussu Curobourso que gagnet, maisei que mountet davant.

— Paubreis einoucents, auves la fi.




De las treis persounas que madamo de Freto-Parpai eiperavo, la prumiero qu'arribet fuguet M. Rabanéu que, coumo sabes, ero un grand medeci. Quante aguet tâtat lou poul de soun malaut qu'avio tournat prêne couneissenço, lou sannet e M. de Freto-Parpai s'eivanûsit per lou secound cop. Un moument après, lou tournet sannà per lou fâ reveni, mas aleidounc

M. de Freto-Parpai s'eivanûsit per lou darnié cop e baret l'ei per toujours ; venio de mourî dins las reglas.

Quante moussu lou curet e moussu Curobourso arriberan sur lou chavau de Batistou, i avio un quart d'ouro que moussu de Freto-Parpai ero mort. Moussu Rabanéu laissavo jamai de que glenà.

Qu'ei dounc lou curet que gagnet maisei que faguet l'entarrament, e lou noutari que perdet maisei que manquet soun testament.

#### A. CHASTANET.





DU MÊME AUTEUR

LOU

PARADIS DE LAS BELAS-MAIS

*(Le paradis des belles-mères)*

Chez les libraires de Périgueux

P  
20